

Broj: 03-02-917/2020
Sarajevo, 23.06.2022. godine

PARLAMENT FEDERACIJE
BOSNE I HERCEGOVINE

- Predstavnički dom -
gosp. Mirsad Zaimović, predsjedavajući
- Dom naroda -
gosp. Tomislav Martinović, predsjedavajući

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Priljeno: 24-06-2022			
Org. jed.	Broj	Priloga	Vrijednost
01,02-02-		1586/20	

Poštovani,

U skladu sa članom IV.B.3.7.c) (III) Ustava Federacije Bosne i Hercegovine, a u vezi sa čl. 178. i 179. Poslovnika Predstavničkog doma Parlamenta Federacije BiH („Službene novine Federacije BiH“, br. 69/07, 2/08 i 26/20) i sa čl. 171. i 172. Poslovnika o radu Doma naroda Parlamenta Federacije BiH („Službene novine Federacije BiH“, br. 27/03, 21/09 i 24/20), radi razmatranja i usvajanja, dostavljam Vam **PRIJEDLOG ZAKONA O IZMJENAMA I DOPUNAMA ZAKONA O PRINCIPIMA LOKALNE SAMOUPRAVE U FEDERACIJI BOSNE I HERCEGOVINE**, koji je utvrdila Vlada Federacije Bosne i Hercegovine na 320. sjednici, održanoj 23.06.2022. godine.

Prijedlog zakona se dostavlja na službenim jezicima i pismima Federacije Bosne i Hercegovine u printanoj i elektronskoj formi (CD).

S poštovanjem,



- Prilog: - Prijedlog zakona na bosanskom jeziku,
- Odredbe Zakona koje se mijenjaju,
- Obrazac broj 2,
- Obrazac IFP NE,
- Mišljenje Saveza općina i gradova Federacije Bosne i Hercegovine i
- Zakon o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09) CD.

Cc: Federalno ministarstvo pravde
gosp. Mato Jozić, ministar

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**ZAKON
O IZMJENAMA I DOPUNAMA
ZAKONA O PRINCIPIMA LOKALNE SAMOUPRAVE
U FEDERACIJI BOSNE I HERCEGOVINE**

Sarajevo, juni 2022. godine

**ZAKON
O IZMJENAMA I DOPUNAMA
ZAKONA O PRINCIPIMA LOKALNE SAMOUPRAVE
U FEDERACIJI BOSNE I HERCEGOVINE**

Član 1.

U Zakonu o principima lokalne samouprave u Federaciji Bosne i Hercegovine („Službene novine Federacije BiH“, br. 49/06 i 51/09), u članu 20. stav 3. mijenja se i glasi:

„(3) Kada vijeće, odnosno načelnik/ca potvrdi svoju odluku, odnosno akt, vijeće, odnosno načelnik/ca može u roku od 15 dana pokrenuti postupak preispitivanja odluke, odnosno akta pred kantonalnim sudom, odnosno pred Vrhovnim sudom Federacije Bosne i Hercegovine, u zavisnosti od toga, da li je odluka odnosno akt, donesen na osnovu kantonalnog ili federalnog zakona“.

Član 2.

Član 24. mijenja se i glasi:

„Član 24.

- (1) Mjesna samouprava u jedinici lokalne samouprave ostvaruje se u mjesnoj zajednici.
- (2) Odluku o osnivanju mjesne zajednice donosi vijeće jedinice lokalne samouprave.
- (3) Odlukom o osnivanju mjesne zajednice utvrđuju se: naziv, sjedište, područje mjesne zajednice, mjesna područja, poslovi iz vlastite nadležnosti lokalne samouprave povjereni mjesnoj zajednici na obavljanje, finansiranje mjesne zajednice, organi mjesne zajednice, postupak donošenja statuta mjesne zajednice i njegovih izmjena i druga pitanja od značaja za rad mjesne zajednice.
- (4) Statut mjesne zajednice donosi savjet mjesne zajednice, te ga putem načelnika/ce podnosi vijeću na potvrdu.
- (5) Statutom mjesne zajednice utvrđuju se: izbor predsjednika/ce organa mjesne zajednice, odgovornost organa mjesne zajednice, akti mjesne zajednice, postupak njihovog donošenja, informiranje i učešće građana u radu organa mjesne zajednice, edukacija članova organa mjesne zajednice i druga pitanja utvrđena odlukom o osnivanju.“

Član 3.

Član 25. mijenja se i glasi:

„Član 25.

Građani putem organa mjesne zajednice učestvuju u poslovima značajnim za život i rad

na području mjesne zajednice, a naročito:

- a) pokreću i učestvuju u javnoj raspravi kod pripreme i donošenja prostorno planske dokumentacije;
- b) pokreću inicijative, daju mišljenja i učestvuju u izgradnji komunalnih i objekata u općoj upotrebi;
- c) pokreću i učestvuju u raspravama o inicijativama i aktivnostima za razvoj privrede i društvenih djelatnosti;
- d) identificiraju osobe kojima je potrebna pomoć ili zaštita i u tu svrhu pokreću saradnju sa stručnim institucijama u oblasti socijalne zaštite;
- e) stvaraju uvjete za dostupnost ustanova i objekata kulture i sporta svim građanima;
- f) preduzimaju mjere za očuvanje i pokreću aktivnosti za unapređenje životne sredine;
- g) drugim poslovima utvrđenim statutom mjesne zajednice vodeći računa o vrsti i obimu potreba, raspoloživim finansijskim i materijalnim sredstvima i interesima građana u cjelini.“

Član 4.

U članu 26. stav 2. mijenja se i glasi:

„(2) Inicijativu za osnivanje mjesne zajednice može pokrenuti najmanje 20% građana upisanih u birački spisak s područja za koje se predlaže osnivanje mjesne zajednice, 1/5 vijećnika ili načelnik/ca jedinice lokalne samouprave.“

Član 5.

U članu 27. riječ: „statutom“ zamjenjuje se riječima: „ovim zakonom“.

Član 6.

Član 28. mijenja se i glasi:

„Član 28.

- (1) Organi mjesne zajednice su savjet i zbor građana. Statutom jedinice lokalne samouprave se mogu predvidjeti i drugi organi mjesne zajednice.
- (2) Savjet mjesne zajednice obavlja poslove mjesne zajednice. Savjet ima od tri do 11 članova, što se utvrđuje statutom jedinice lokalne samouprave.
- (3) Vijeće donosi odluku kojom utvrđuje pravila za neposredne izbore savjeta mjesnih zajednica koji se održavaju šest mjeseci nakon lokalnih izbora.
- (4) Zbor građana je konsultativni vid učešća građana u djelovanju mjesne zajednice, a čine ga sve osobe sa područja mjesne zajednice upisane u birački spisak. Zbor građana se može organizirati po pojedinim mjesnim područjima.
- (5) Stručne i administrativno-tehničke poslove za potrebe savjeta i zbora građana obavlja

sekretar mjesne zajednice. Sekretar može obavljati navedene poslove za jednu ili više mjesnih zajednica.“

Član 7.

Iza člana 28. dodaje se novi član 28a. koji glasi:

„Član 28a.

Kolegij mjesnih zajednica se sastoji od predsjednika/ca savjeta u jedinici lokalne samouprave. Sastaje se najmanje dva puta godišnje i učestvuje u konsultativnim procesima u jedinici lokalne samouprave. Članovi Kolegija mjesnih zajednica mogu podnositi inicijative i postavljati pitanja u rangu vijećničkog pitanja. Statutom jedinice lokalne samouprave se detaljnije reguliraju pitanja organizacije i funkcioniranja Kolegija mjesnih zajednica.“

Član 8.

U članu 30. riječi: „izvornog djelokruga“ zamjenjuju se riječima: „vlastitih nadležnosti jedinice“.

Član 9.

Član 31. mijenja se i glasi:

„Član 31.

Sredstva mjesne zajednice se osiguravaju:

- a) u budžetu jedinice lokalne samouprave;
- b) iz sredstava za usluge koje svojim aktivnostima ostvaruje mjesna zajednica;
- c) osobnim učešćem građana;
- d) donacijom;
- e) i izvorima određenim drugim zakonom ili odlukom vijeća jedinice lokalne samouprave.“

Član 10.

Iza člana 31. dodaje se novi član 31a. koji glasi:

„Član 31a.

Jedinice lokalne samouprave su dužne voditi računa o ravnomjernom razvoju mjesnih zajednica, a u skladu s kriterijima koje, na prijedlog općinskog načelnika, donosi općinsko vijeće.“

Član 11.

U članu 32. dodaje se novi stav 2. koji glasi:

„(2) U slučaju povjeravanja poslova iz člana 30. ovog zakona nadzor nad njihovim

obavljanjem vrši načelnik/ca putem službe jedinstvenog općinskog organa uprave nadležnog za te poslove.“

Član 12.

- (1) Kantoni su dužni uskladiti svoje zakone s ovim zakonom u roku od šest mjeseci od dana njegovog stupanja na snagu.
- (2) Jedinice lokalne samouprave su dužne uskladiti svoje akte s ovim zakonom u roku od 12 mjeseci od dana njegovog stupanja na snagu.

Član 13.

Ovaj zakon stupa na snagu osmog dana od dana objave u „Službenim novinama Federacije BiH“.

**OBRAZLOŽENJE
PRIJEDLOGA ZAKONA O IZMJENAMA I DOPUNAMA
ZAKONA O PRINCIPIMA LOKALNE SAMOUPRAVE
U FEDERACIJI BOSNE I HERCEGOVINE**

I – USTAVNI OSNOV

Ustavni osnov za donošenje Zakona je sadržan u članu IV. A. 20. (1) d) Ustava Federacije Bosne i Hercegovine koji, u okviru nadležnosti Parlamenta, predviđa donošenje zakona o vršenju funkcija federalne vlasti.

II – RAZLOZI ZA DONOŠENJE

Postojeći Zakon predviđa uzajamnu mogućnost organa jedinice lokalne samouprave usmjerenu ka zahtjevu za preispitivanjem odluke odnosno akta za koji se smatra da je neustavan odnosno nezakonit. U slučaju nepostizanja istovjetnog stava na nivou jedinice lokalne samouprave predviđen je postupak preispitivanja pred nadležnim organom. Pri tome, nadležni organ nije preciziran čime je nastala pravna praznina koja je stvarala teškoće u dosadašnjoj primjeni Zakona. Stoga, razlog za donošenje ovog zakona je u popuni te pravne praznine i stvaranju uvjeta za otklanjanje eventualnih blokada u radu organa jedinice lokalne samouprave.

Nadalje, razlog za donošenje Zakona je izmjena odredbi koje se odnose na mjesne zajednice u cilju postizanja neophodnog minimuma jednoobraznosti na nivou Federacije Bosne i Hercegovine, te preciznijeg definiranja organa mjesne zajednice, poslova koje obavljaju, ovlaštenih podnosilaca inicijative za osnivanje mjesne zajednice, sadržine akata koji se odnose na rad mjesne zajednice kao i izvora finansijskih sredstava. Ovdje je i potreba uvođenja veće povezanosti mjesnih zajednica s jedinicom lokalne samouprave što se želi postići formiranjem Kolegija mjesnih zajednica.

Naposlijetku, razlog za donošenje je i u terminološkom usaglašavanju na mjestu gdje je neusaglašenost uočena.

III – KONSULTACIJE

Predstavnički dom Parlamenta Federacije Bosne i Hercegovine je na 16. redovnoj sjednici održanoj 02.12.2020. godine usvojio Zaključak, broj: 01-02-1586/20 od 09.12.2020. godine, kojim je prihvatio Nacrt zakona o izmjenama i dopunama Zakona o principima lokalne samouprave u Federaciji BiH, te smatra da isti može poslužiti kao dobra osnova za izradu Prijedloga zakona. U istom zaključku predlagač je zadužen da organizira i provede javnu raspravu u trajanju od 30 dana, te da predlagač prilikom izrade Prijedloga zakona uzme u obzir sve prijedloge, primjedbe i sugestije iznesene u raspravi, kao i one koje su dostavljene ili će biti dostavljene u pisanom obliku.

Dom naroda Parlamenta Federacije Bosne i Hercegovine je na 9. sjednici održanoj 18.02.2021. godine usvojio Zaključak, broj: 02-02-1586/20 od 18.02.2021. godine, kojim je prihvatio Nacrt zakona o izmjenama i dopunama Zakona o principima lokalne

samouprave u Federaciji BiH, te smatra da isti može poslužiti kao dobra osnova za izradu Prijedloga zakona. U istom zaključku predlagač je zadužen da organizira i provede javnu raspravu u trajanju od 60 dana u skladu s procedurama predviđenim u Ustavu Federacije Bosne i Hercegovine za donošenje zakona iz zajedničke nadležnosti federalne vlasti i kantona, te da predlagač prilikom izrade Prijedloga Zakona uzme u obzir sve prijedloge, primjedbe i sugestije iznesene u raspravi, kao i one koje su dostavljene ili će biti dostavljene u pisanom obliku.

Federalno ministarstvo pravde je aktom broj: 09-49-240/20 od 26.04.2021. godine Savezu općina i gradova Federacije Bosne i Hercegovine dostavilo navedene zaključke s izvodima iz transkripta, te zatražilo da se o ovom pitanju upoznaju sve jedinice lokalne samouprave u Federaciji Bosne i Hercegovine, te da se pristigli prijedlozi, primjedbe i sugestije dostave u roku od 60 dana kako bi se pripremio Prijedlog Zakona.

Savez općina i gradova Federacije Bosne i Hercegovine dostavio je Federalnom ministarstvu pravde sve pristigle prijedloge, primjedbe i sugestije nakon čega je održano niz sastanaka oko njihovog usaglašavanja nakon čega je Savez općina i gradova Federacije Bosne i Hercegovine dostavio Stav broj: 248/1/22 od 01.04.2022. godine u kojem se navodi da „Predsjedništvo Skupštine Saveza općina i gradova Federacije Bosne i Hercegovine podržava dostavljeni Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine”.

Tokom priprema za izradu ovog zakona su održani sastanci neposredno s građanima u mjesnim zajednicama na kojima je sagledano trenutno stanje u organizaciji i funkcioniranju mjesne samouprave. Tom prilikom, građani su iznosili svoje viđenje, te iskazali potrebe i očekivanja koja imaju od svoje mjesne zajednice. Spoznaje dobivene na ovaj način definiraju mjesnu zajednicu kao mjesto okupljanja građana s višenamjenskim funkcijama, a za ostvarenje ovakve vizije su neophodne i zakonske izmjene.

Osim toga, partnerskim jedinicama lokalne samouprave je upućen anketni upitnik kako bi se pribavila njihova mišljenja o kvalitetu zakonskih rješenja koja se odnose na mjesnu samoupravu. Presjek dobivenih odgovora na pitanja ankete pokazao je potrebu izmjene Zakona o principima lokalne samouprave u Federaciji Bosne i Hercegovine u dva pravca:

1. redefiniranje u cilju preciznijeg definiranja odredbi koje se odnose na mjesnu samoupravu, i
2. postizanje neophodnog minimuma jednoobraznosti na nivou Federacije Bosne i Hercegovine.

Konkretni prijedlozi dobiveni na naprijed opisane načine su ugrađeni u Zakon.

Zakon je prezentiran na četiri radionice u saradnji i organizaciji Saveza općina i gradova FBiH na kojima su predstavnici jedinica lokalne samouprave upoznati sa pojedinim odredbama, te im je pružena mogućnost postavljanja pitanja, davanja komentara, primjedbi i sugestija. Većina njih je usvojena, a odbijeno je, primjerice, da se u članu 3. riječ „očuvanje“ zamijeni riječju „zaštita“ sa stanovišta da to ne donosi suštinsko

poboljšanje. Isto tako, primjedba da se prelazna odredba preciznije definira nije usvojena, obzirom da je stav kako je dana formulacija dovoljno precizna. Svi prijedlozi, primjedbe i sugestije su razmotrene i usaglašene sa predstavnicima Saveza općina i gradova Federacije Bosne i Hercegovine.

IV – OBRAZLOŽENJE PRAVNIH RJEŠENJA

Član 1.

Član 20. postojećeg Zakona predviđa uzajamnu mogućnost organa jedinice lokalne samouprave usmjerenu ka zahtjevu za preispitivanjem odluke odnosno akta za koji se smatra da je neustavan ili nezakonit. U slučaju nepostizanja istovjetnog stava na nivou jedinice lokalne samouprave predviđen je postupak preispitivanja pred nadležnim organom a to je kantonalni sud, odnosno Vrhovni sud Federacije Bosne i Hercegovine, u zavisnosti od toga, da li je odluka odnosno akt, donesen na osnovu kantonalnog ili federalnog zakona.

Član 2.

Član 24. se mijenja u pravcu uvođenja mjesne zajednice kao jedinog organizacijskog oblika mjesne samouprave. Precizira se osnivanje mjesne zajednice odlukom vijeća jedinice lokalne samouprave. Proširen je krug zakonskih elemenata koje odluka o osnivanju mora sadržavati, uključujući postupak donošenja statuta mjesne zajednice, za koji su takođe određeni zakonski elementi.

Član 3.

Svrha izmjene člana 25. postojećeg Zakona je preciziranje poslova u kojima organi mjesne zajednice učestvuju a ne odlučuju, pošto ni u jednom navedenom slučaju ne donose meritorne odluke. U tom pravcu su u cilju preglednosti u dvije alineje razdvojeno donošenje prostorno planske dokumentacije i objekti u komunalnoj i općoj upotrebi. Nadalje, učinjena je razlika između pomoći i zaštite koje mogu biti potrebne različitim kategorijama osoba. U istom smislu se pravi razlika između preduzimanja mjera za očuvanje postojećeg nivoa zaštićene životne sredine i pokretanja aktivnosti ka njenom unapređenju. Sve u svemu, za očekivati je da će na ovakav način definirani poslovi olakšati organima mjesne zajednice njihovo sprovođenje.

Član 4.

U članu 26. stav 2. postojećeg Zakona a koji se odnosi na određenje nosioca inicijative za osnivanje mjesne zajednice se precizira postotak od najmanje 20% građana upisanih u birački spisak s područja za koje se predlaže osnivanje mjesne zajednice, odnosno 1/5 vijećnika ili načelnik/ca jedinice lokalne samouprave.

Član 5.

Dosadašnji član 27. je predvidio utvrđivanje prava i dužnosti mjesne zajednice statutom jedinice lokalne samouprave. U cilju postizanja potrebne unifikacije ta prava i dužnosti se sada okvirno utvrđuju Zakonom.

Član 6.

Izmjena člana 28. se odnosi na preciziranje organa mjesne zajednice: obavezno savjet i zbor građana uz mogućnost jedinice lokalne samouprave da uvede i druge organe svojim statutom, određuju se njihova uloga i sastav, pitanje izbora Savjeta, te poslovi koje obavlja sekretar mjesne zajednice.

Član 7.

Novim članom 28a. se uvodi Kolegij mjesnih zajednica kao konsultativno tijelo koje predstavlja sponu između jedinice lokalne samouprave i pripadajućih joj mjesnih zajednica. Sastoji se od predsjednika/ce savjeta, uz obavezu sazivanja najmanje dva puta godišnje i sa mogućnošću podnošenja inicijativa i postavljanja pitanja u rangu vijećničkog pitanja.

Član 8.

U cjelini teksta postojećeg Zakona se koristi termin „vlastite nadležnosti jedinice lokalne samouprave“. Samo, u članu 30. postoji odstupanje upotrebom termina „izvorni djelokrug“. Da bi se postigla leksička jednoobraznost predviđena je navedena izmjena.

Član 9.

Član 31. se mijenja u cilju preciznog definiranja izvora finansiranja brisanjem uopćenih formulacija (na primjer, st. 1. i 2. postojećeg Zakona), te taksativnim nabrojanjem osnova po kojima mjesne zajednice stižu sredstva.

Član 10.

Član 31a. naglašava dužnost jedinica lokalne samouprave da vode računa o ravnomjernom razvoju mjesnih zajednica, a u skladu s kriterijima koje, na prijedlog općinskog načelnika, donosi općinsko vijeće.

Član 11.

U članu 32. dodaje se stav 2. koji regulira pitanje nadzora nad obavljanjem poslova koji su od strane jedinice lokalne samouprave povjereni mjesnoj zajednici.

Član 12.

Član utvrđuje obavezu kantona i jedinica lokalne samouprave na usaglašavanje svojih propisa sa ovim zakonom.

Član 13.

Član određuje stupanje na snagu Zakona o izmjenama i dopunama Zakona o principima lokalne samouprave u Federaciji Bosne i Hercegovine.

V – USKLAĐENOST SA PROPISIMA EVROPSKE UNIJE

U pogledu obaveze usklađivanja predmetnog zakona s pravnom stečevinom Evropske unije, ističemo da je izvršena analiza primarnih i sekundarnih izvora Evropske unije, te je utvrđeno da ne postoje mjerodavne odredbe sa kojima bi se vršilo usklađivanje.

VI - FINANSIJSKA SREDSTVA

Za realizaciju ovog zakona nisu potrebna dodatna finansijska sredstva. Jedino je potrebno da jedinice lokalne samouprave u svojim budžetima sredstva namijenjena za rad mjesnih zajednica ravnomjerno rasporede za sve postojeće na svom području. U pogledu sredstava za naknade članovima organa mjesnih zajednica ona, tamo gdje su predviđena, ostaju u istom iznosu. Kolegij mjesnih zajednica jeste novi organ, ali u njegovom sastavu su predsjednici savjeta koji, po tom osnovu, eventualno primaju naknadu.

**Zakon o principima lokalne samouprave u Federaciji Bosne i Hercegovine
(„Službene novine Federacije BiH“, br. 49/06 i 51/09)**

ODREDBE ZAKONA KOJE SE MIJENJAJU

Član 20.

Vijeće, odnosno načelnik/ca može u roku od tri dana nakon donošenja odluke zatražiti da vijeće, odnosno načelnik/ca preispita odluku ili akt koji smatra neustavnim ili nezakonitim.

U slučaju iz prethodnog stava nadležni organ dužan je preispitati svoju odluku, odnosno akt u roku od 30 dana i obavijestiti vijeće, odnosno načelnika o svojoj odluci do kada se taj akt neće izvršiti.

Kada vijeće, odnosno načelnik/ca potvrdi svoju odluku, odnosno akt, vijeće, odnosno načelnik/ca može u roku od 15 dana pokrenuti postupak preispitivanja odluke, odnosno akta pred nadležnim organom u skladu sa ustavom i zakonom.

Član 24.

Mjesna samouprava u jedinici lokalne samouprave ostvaruje se u mjesnoj zajednici kao obaveznom obliku mjesne samouprave koju osniva vijeće, te u gradskim četvrtima i drugim oblicima mjesne samouprave u skladu sa statutom jedinice lokalne samouprave.

Odlukom o osnivanju mjesne zajednice utvrđuju se: naziv, sjedište, područje mjesne zajednice, mjesna područja, odnosno drugi dijelovi mjesne zajednice, kao i druga pitanja u vezi sa ostvarivanjem mjesne samouprave.

Član 25.

Građani u mjesnoj zajednici putem organa mjesne zajednice odlučuju o poslovima značajnim za život i rad na području mjesne zajednice, a naročito:

- pokreću i učestvuju u javnoj raspravi kod pripreme i donošenja urbanističkih planova na području mjesne zajednice, pokreću inicijative, daju mišljenja i učestvuju u izgradnji komunalnih objekata i objekata u općoj upotrebi;
- pokreću i učestvuju u raspravama o inicijativama i aktivnostima za razvoj privrede i društvenih djelatnosti;
- brinu o zaštiti osoba kojima je potrebna pomoć i u tu svrhu pokreću saradnju sa stručnim organima u oblasti socijalne zaštite;
- staraju se o razvoju kulture i sporta i stvaraju uvjete za dostupnost ustanova i objekata kulture i sporta svim građanima, a pogotovo mladim;
- stvaraju uvjete i preduzimaju mjere za očuvanje i zaštitu prirodnih i radom ostvarenih vrijednosti čovjekove sredine;
- drugim poslovima utvrđenim statutom i pravilima mjesnih zajednica vodeći računa o vrsti i obimu potreba, raspoloživim sredstvima i interesima građana u cjelini.

Član 26.

Mjesna zajednica može biti osnovana za jedno naseljeno mjesto, više međusobno uvezanih manje naseljenih mjesta, ili za veći dio naselja koji u odnosu na ostale dijelove naselja čini cjelinu.

Inicijativu za osnivanje mjesne zajednice mogu pokrenuti građani, udruženja građana sa područja naseljenog mjesta za čije se područje predlaže osnivanje nove mjesne zajednice, vijeće ili načelnik/ca jedinice lokalne samouprave.

Mjesna zajednica osniva se na način i po postupku utvrđenom statutom jedinice lokalne samouprave u kojoj se osniva mjesna zajednica.

Član 27.

Mjesna zajednica ima svojstvo pravnog lica u okviru prava i dužnosti utvrđenih statutom i odlukom o osnivanju.

Član 28.

Statutom mjesne zajednice, u skladu sa statutom jedinice lokalne samouprave i aktom o osnivanju, utvrđuju se poslovi koje obavlja mjesna zajednica, organi, kao i postupak izbora, organizacija i rad organa, način odlučivanja i druga pitanja od značaja za rad mjesne zajednice.

Član 30.

Odlukom vijeća jedinice lokalne samouprave može se svim ili pojedinim mjesnim zajednicama povjeriti obavljanje određenih poslova iz izvornog djelokruga lokalne samouprave, uz osiguranje za to potrebnih sredstava.

Član 31.

Sredstva za rad mjesne zajednice, odnosno drugog oblika mjesne samouprave su:

- 1) mjesne zajednice imat će prihode srazmjerne ovlaštenjima predviđenim zakonom i statutom;
- 2) sistem finansiranja mjesnih zajednica mora biti dovoljno raznovrstan i evolutan kako bi mogao slijediti, koliko je praktički moguće, promjene stvarnih troškova obavljanja poslova iz ovlaštenja mjesne zajednice;
- 3) sredstva osigurana iz sredstava samodoprinosu;
- 4) sredstva za usluge koja svojim aktivnostima ostvaruje mjesna zajednica;
- 5) pokloni i druga sredstva.

Mjesna zajednica koristi sredstva u skladu sa svojim programima i planovima.

Član 32.

Nadzor nad radom organa mjesne zajednice vrši vijeće jedinice lokalne samouprave na način utvrđen statutom.

Sarajevo, 01.04.2022. godine

Broj: 248/1 /22

BOSNA I HERCEGOVINA
FEDERACIJA BOSNE I HERCEGOVINE
FEDERALNO MINISTARSTVO PRAVDE

N/r: Mato Jozić, ministar

N/r: Enver Išerić, direktor Zavoda za javnu upravu

PREDMET: Stav Predsjedništva Skupštine Saveza općina i gradova FBiH o Nacrtu Zakona o izmjenama i dopunama Zakona o principima lokalne samouprave u FBiH

Poštovani,

U vezi Vašeg akta broj: 09-49-240/20 od 16.03.2022. godine, u prilogu kojeg ste nam dostavili Nacrt Zakona o izmjenama i dopunama Zakona o principima lokalne samouprave u Federaciji Bosne i Hercegovine na razmatranje i davanje mišljenja, ovim putem Vas obavještavamo da Predsjedništvo Skupštine Saveza općina i gradova Federacije Bosne i Hercegovine podržava dostavljeni Nacrt Zakona o izmjenama i dopunama Zakona o principima lokalne samouprave u Federaciji Bosne i Hercegovine.

Koristimo priliku da Vam se zahvalimo na kontinuiranoj saradnji u postupku izrade Nacrta Zakona o izmjenama i dopunama Zakona o principima lokalne samouprave u Federaciji Bosne i Hercegovine.

S poštovanjem,

Dostavljeno:

- Naslovu
- a/a



Direktor Saveza
Vesna Travljanin

Musala 5/1 71000 Sarajevo

Tel: +387 (0)33 216 502; +387 (0)33 209 024; +387 (0)33 209 120; +387 (0)33 552 811

Fax: +387 (0)33 552 810; +387 (0)33 216 502 / Email: savez@sogfbih.ba / Web: www.sogfbih.ba

KONTROLNA IZJAVA O PROVEDENOJ PROCJENI UTJECAJA PROPISA

Kontrolna Izjava o provedenoj procjeni utjecaja propisa		
Naziv prednacrt/nacrta zakona	Nacrt zakona o izmjenama i dopunama Zakona o principima lokalne samouprave u Federaciji Bosne i Hercegovine	
Datum	19.04.2022. godine	
Kontrolno područje	DA	Obrazloženje Ureda
AKTIVNOST		
Naziv prednacrt/nacrta zakona je naveden i razumljiv	DA	
Naveden je naziv i kontakti obrađivača	DA	
Naveden je datum	DA	
DEFINIRANJE PROBLEMA		
Problem je jasno i sažeto objašnjen	DA	
Ciljevi su jasno i sažeto objašnjeni	DA	
Očekivani rezultati su jasno i sažeto objašnjeni	DA	
KONZULTACIJE		
Zainteresirane strane su jasno definirane	DA	
Proces konzultacija je jasno i sažeto objašnjen	DA	
PREDLOŽENA RJEŠENJA		
Predložena su normativna i nenormativna rješenja	DA	
Definirani su rizici predloženog rješenja	DA	
Definiran je utjecaj rješenja na proračun	DA	
Definiran je utjecaj rješenja na gospodarstvo, društvo, okoliš, te održivi razvoj i zdravlje ljudi	DA	
Definiran je način primjene i usuglašenost s ostalim propisima	DA	
Definirano je prijelazno razdoblje	DA	
PROCJENA PROVEDENA SUKLADNO UREDBI	DA	

URED VLADE FBiH ZA KONODAVSTVO I USKLADENOST
SA PROPISIMA EUROPSKE UNIJE
Zeljko Šitadi, direktor Ureda

Datum i pečat


OVIJESTENA OSOBA

Andea Merka

19.04.2022.

OBRAZAC IZJAVA O FISKALNOJ PROCJENI

Obrazac IFP NE

A 1. Obradivač propisa		KOD	NAZIV	
Razdjel				
B 2. Osnovni podaci o prijedlogu propisa				
Vrsta propisa/akta	Zakon			
Naziv propisa/akta	Uredba			
		Odluza	Strategija	
		Drugi akti	Drugi akti planiranja	
C 3. Izjava o nepostojanju fiskalnih efekata predloženog propisa				
Ta provedenja ovo Zakona nije potrebno izdvojati dodatna finansijska sredstva iz Budžeta FBiH.				
				
D 4. Pecat i potpis odgovornog lica		Mjesto i datum		
			17-03-2022	

